

# Terpikat keindahan Sabah

UB 10.02.2012 A7

**KOTA KINABALU:** Berasal dari kawasan jauh dari pantai, Wang Xiao Ying, 22, percaya dia telah membuat pilihan yang tepat apabila memilih Universiti Malaysia Sabah (UMS) untuk melanjutkan pengajian.

Malah, keindahan alam yang menghijau dan suasana tenang Sabah turut menjadikannya lebih yakin untuk menimba ilmu di Negeri Di Bawah Bayu ini.

“Saya suka Malaysia walaupun

agak panas. Di sini ada banyak pokok. Saya pernah mencari maklumat tentang negara ini di internet dan ternyata Malaysia memang indah...saya gembira berada di sini,” katanya yang berasal dari wilayah Shandong, China.

Pertama kali datang ke Malaysia, Wang adalah salah seorang daripada 46 pelajar China yang mendaftar diri untuk mengikuti Program Asas Pelajar Antarabangsa selama enam bulan bagi melayakkan mereka meneruskan pengajian di UMS.

Meminati bidang pendidikan, dia yang merupakan anak tunggal berhasrat menjadi guru apabila berjaya menghabiskan pengajiannya di negeri ini nanti dan kembali ke China.

“Saya ingin mengajar bahasa Inggeris apabila pulang ke China nanti,” katanya yang fasih berbahasa Inggeris.

Bagi Yu Zi Xun, 20, peluang belajar di Malaysia akan digunakan sebaiknya bagi mencapai cita-citanya untuk menjadi pengurus sumber manusia.

“Keluarga menyokong keputusan saya yang memilih Malaysia untuk melanjutkan pelajaran. Jadi, saya tidak akan sia-siakan peluang ini,” katanya yang pertama kali datang ke Malaysia.


Juga berasal dari wilayah Shandong, Yu berkata selain terpikat dengan keindahan Malaysia, yuran pembelajaran di sini juga berpatutan.

Satu-satunya pelajar dari Korea Selatan, Kim Keon Hee, 19, juga teruja berada di negeri ini.

Berada di Sabah sejak sebulan lalu, dia yang berasal dari kota metropolitan Seoul kini cuba membiasakan diri dengan cuaca panas di Sabah tetapi pada masa sama menyukai pemandangan hijau di negeri ini.

Kata Kim, ibunya pernah melancong ke Sabah dan turut bercerita tentang keindahan negeri ini malah bapanya juga akan berkunjung ke Sabah pada Mac nanti.

“Banyak yang saya dengar tentang Sabah dan saya percaya, berada di sini akan memberikan pengalaman yang menyeronokkan,” katanya yang memilih bidang Sains Makanan sebagai kursus pilihan.



**YU ZI XUN**



**KIM KEON HEE**



**WANG XIAO YING**